



1. Oktober 2024

UKA2024/30

**Nunami inuussutissarsiutinut tunngatillugu inuussutissarsionermik siuarsaaneq pillugu Inatsisartut inatsisaata allanngortinneqarnera pillugu Inatsisartut inatsisissaat**

(Inuutissarsionermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Siumut sinnerlugu Naalakkersuisut saqqummiussaannut qujanaq.

Aallarnisaaneq, Inuussutissarsionermilu siuarsaanermi misileraaneq iluatsissimappat Siumumiit nuannaarutigalu Inuussutissarsiorfiit pioreersut nutaamillu eqqarsarneq siuarsaqqinnissamillu periusissiorneq tamakkiisumik tapersorsorparput.

Annikitsumik taarsigassarsisiteriaaseq ataavartunngortinniarnearpoq. Annikitsumik taarsigassarsisiteriaaseq ukiuni sisamani misiligutaasoq ingerlanneqarpoq iluatsilluartumik, ataavartunngortinneqarnissaa Siumumiit ilaleratsigu oqaatigissavara.

Aallarnisaasut Inuussutissarsiortullu immikkoortuni tamani amerlanerusut pisariaqartippagut, nunatsinni sumiiffinni tamani aallarnisaaneq Naalakkersuisut eqqumaffigimmassuk Siumumiit maluginiarparput, taamaattumik sinaakkutit imaattut pisariaqarput periarfissaanissaat. Inatsimmi uani anguniarneqarpoq akimmiffiit eqaallisarneqassasut, periusissiallu anguniagai pitsaasutut nalilerpagut, periuseriniarneqartoq tapertaalluassaaq, aallarnisaanermi inuussutissarsionermilu.

Siumumit siunertaarput inuussutissarsiorneq arlalinnik tunngaveqartoq pilersikkumallugu, nunanullu allanut unammillersinnaasoq piorsaavigissallugu. Inuussutissarsiutitigit assigiinngiaartumik aningaasarsionikkut toqqammaveqarnissaaq anguniarlugu suliffeqarfinnut atugassarititaasut ataavartumik eqaannerulersillugillu pitsanngorsartuarneqassasut.

Innuttaasoq kinaluunniit inuussutissarsiutinik nammineerluni ingerlataqarnissamut piumassuseqartoq namminersorluni ingerlataqalernissamut eqaannerusumik ajornaannerusumillu periarfissaqartinneqartariaqarpoq. Inuussutissarsiutitigit tapiissutaasartut pitsaanerusumik kinguneqarnerusumillu atorneqartalernissaat siunertaralugu aqqissuusseqqittoqarnissaa, nunami sullivinnik nutaanik nioqqutissiorfiusunik pilersitsiortornissaaq siunertaralugu. Piorsaansami suliffeqarfinnillu amerlanerusunik pilersitsiniarnermi namminersorlutik suliffeqarfinnik pilersitsiniartut pisortaniit tapersorsorneqartarnerat siunertaqarluartumik piorsarneqassasoq Siumumiit qulakkiissavarput.

Periusissiami immikkoortut ukkatarineqartut ersarikkaluartut, Naalakkersuisut, Kommunit kiisalu innuttaasut kaammattussavagut, eqaallisaanissaaq paasititsiniaanertalimmik aqqissuussinissaaq naleqqussartariaqaraat ilanngulluguttaaq sumiiffinni isorliunerusuni malugineqarluni ingerlanneqassasoq. Aammattaaq eqqaanngitsoorsinnaanngilarput akileraarusersueriaaserput ilumut



naleqquttuunersoq nalilersoqqinneqartariaqalinnginnersoq, imaassinnaangilarmi aallarnisaasut aallartikkaluaannaq akiliisinnaajunnaarnissaat akileraarusersueriaaseq peqqutigalugu kinguneqartaannassappat. Aningaasarsiorfissanik nutaanik pilersitsinerusariaqarpugut, taamaattumik aallarnisaasunut sinaakkutit taamatut eqaallisaavigalugit ajornannginnerulersitsinissaq ilalerluinnaratsigu. Nutaaliorneq nutaamillu eqqarsarneq periusissiornermi ilanngullugu eqqartorneqarneruli. Nunami inuussutissarsiorneq maannakkornit annertunerungaartumik aningaasarsiornermullu malunnaatilimmik pilersitsiffiusumik aallartittariaqalerpoq. Naatsumik oqaatigalugu nunami pisuussutigut uumaatsut ilanngullugit atorluarnerusariaqarpagut aningaasarsiornermullu atorluarlugit.

*Pilersikkumallugit inuiaqatigiit nunamik tunniussinnaasai akisussaassuseqartumik atorluarlugit avataaniillu pisariaqartitatik iluaqutigalugit imminnut napatittut.*

Siunnersuut inatsimmik allannguissamik eqaallisaanissamillu malitassiuunneqarnissaanik siunertaqartoq Siumumiit taperserparput, taamaattumik aatsitassanut inuussutissarsiornermullu ataatsimiititaliamut eqqartorluarneqarnissaanik innersuussutigarpur.

Lars Poulsen, Siumut